



Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/09-00443 pillugu sisamangornermi ulloq 19. november 2009-mi aalajangerneranik Naalakkersuisunut ilisimatitsineq.

Nummi GU-p allilerneqarnissaanut imm. 2-mut aamma 3-mut aningaasaliissutit atugassanngortinneqarnissaat

Naalakkersuisut **inassutigaa**,

- kontomi pingaarnermi 80.00.00-imi, Sanaartornermut atugassanut agguanneqanngitsunut tunngasumi, aningaasaliissutit 17,5 millioner koruuninik ikilineqassasut,
- kontomi pingaarnermi 84.40.12-imi, Ilinniartitaanermit sanaartukkanut tunngasumi, suliasamat nr. 060.52.043-mut, Nummi GU-p allilerneqarnerata imm. 2-anut tunngasumut, aningaasaliissutit 17,5 millioner koruuninik amerlineqassasut.

Aningaasaqarnermut Ataatsimiititaliap oqaaseqaatai

Nummi GU-p allilerneqarnissaa siunertaralugu sanaartornermut atugassat agguanneqanngitsut atugassanngortinneqarnissaat Naalakkersuisut suliami matumani qinnutigaa.

Missingersuusiatic-t aallaavigalugit aningaasanik atugassaqaarnissaq qinnutigineqarpoq. Siusinnerusukkut missingersuusiatic-t aallaavigalugit aningaasaliissutinik atugassiisarnert annertuumik missingersuutinik qaangiisarnernik kinguneqartarnikuupput. Taama siusitsigisukkut sanaartugassatut pilersaarummik aallartitsinissamik akuersinikkut sanaartugassanut pineqartunut annertuumik aningaasaliissutinik qaffaanissamat piunasaqaatinik itigartikkuminaatsunik nunatta karsia kingusinnerusukkut ilimagisaqaarsinnaavoq, taamaaliornermi sanaartorneq naatsorsuutigisatut ingerlanneqanngippat aningaasaliissutaareersut annaaneqarsinnaanerannik Naalakkersuisut oqaarsinnaassammata. Tamannarpiaq pissutigalugu missingersuusiatic-nik Namminersorlutik Oqartussat ataatsimut isigalugu aallaaveqartarunnaarnikuupput.

Aningaasat qinnuteqaataasut ilaat amerlasuut 2009-mi atornerqarnissaat angumerineqarsinnaanaviannngitsoq isummernissamat tunngavissiami allaqqavoq. Tamatumunnga atatillugu eqqaasitsissutigineqartariaqarpoq AIS-10-p, AIS09-p, AIS08-p, AIS07-p, AIS06-p, AIS05-p aamma AIS04-p aappassaaneerqarnissaannut isumaliutissiissutit suliarineqarnerannut atatillugu kaammattuut una (assingusulluunniit) Aningaasaqarnermut Ataatsimiititaliamit saqqummiunneqarmata:

Kaammattuut nr. 5

*Aningaasat Sanaartugassanut Iluarsagassanullu Aningaasaateqarfimmi atorneqaratik uninggaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliissutinik atuinissamik **piviusorsior tumik** missingersuusiortarnissamik qulakkeerinninni arnerminnik Naalakkersuisut ingerlatsiinnarnissaat Aningaasaqarnermut Ataatsimiititaliamit **kaammattuutigineqarpoq.***

Ajoraluartumilli suliap uuma uppersarpaa sanaartugassanut aningaasaliissutinut piviusorsior tumik tunngaveqarluni missingersuusiortoqartannginnera! Akerlianilli aningaasat ukioq manna atorneqarsinnaasunit amerlanerusut Sanaartornermut Iluarsaanermullu Aningaasaateqarfimmi uninggasuutigineqartussanngorlugit immikkoortinni arneqarput. Tamanna Sanaartornermut Iluarsaanermullu Aningaasaateqarfiup siunertaanut toqqaannartumik akerliuvoq.

Aammattaaq eqqaasitsissutigineqassaaq 2010-mi aningaasanut inatsisissatut siunnersuutip aappasaaneerneqarnissaanut isumaliutissiissummini immikkoortoq 1.4-p ataani Aningaasaqarnermut Ataatsimiititaliaq ima allammat:

Naggasiut

Sanaartugassanut Iluarsagassanullu Aningaasaateqarfimmi atorneqaratik uninggaannartussanngorlugit sillimmatit aningaasaliussat sanaartugassatut pilersaarutinut aalajangersimasunut atugassiissutigineqarnissaat 2009-p naanerani qinnuteqaatigineqartariaqanngimmat Aningaasaqarnermut Ataatsimiititaliap Naalakkersuisunut naggasiutigalugu eqqaasitsissutigissavaa. Tassunga atatillugu Aningaasaqarnermut Ataatsimiititaliap 2009-imi ataatsimiinnera kingulleq ulloq 16. december 2009-mi ingerlanneqassammat oqaatigineqassaaq. Taamaattumillu 2009-mi ullup tamatuma kingorna aningaasaliissuteqarnissamik qinnuteqaatinik allanik ataatsimiititaliap suliarinninnissaanut periarfissaqassanngilaq.

Tamatuma saniatigut 2010-mi aningaasanut inatsisissatut siunnersuutip aappasaaneerneqarnissaanut Aningaasaqarnermut Ataatsimiititaliap isumaliutissiissutaani immikkoortoq 2.1-mi konto pingaarnerup 84.40.12-ip, Ilinniartitaanermut sanaartukkanut tunngasup, ataani allassimasut pillugit Naalakkersuisut ataatsimiititaliamit eqqaasinneqassapput. Nuummi GU-mik allilerinissamik pilersaarut suliami matumani pineqartoq immikkoortumi tassani ataatsimiititaliamit sammineqarpoq. Nuummi GU-mi siullermeertumik 2007-imi allilerineq pillugu Aningaasaqarnermut Ataatsimiititaliap sakkortuumik uparuaanera aallaavigalugu Aningaasaqarnermut Ataatsimiititaliaq isumaliutissiissummi ilaatigut ima allappoq:

Allilerinissami ajornartorsiutit siuliani taaneqartut uteqqinneqannginnissaat Aningaasaqarnermut Ataatsimiititaliamit ersarilluinnartumik naatsorsuutigineqarpoq. Pilersaarummik suliarilluakkamik aningaasaqarnikkullu illersorneqarsinnaasumik aammalu Inatsisartunit imaaliallaannarlugu akuerineqarsinnaasumik saqqummiussisoqarnissaanik Naalakkersuisut piffissaagallartillugu qulakkeerinnissasut naatsorsuutigineqarpoq. Pilersaarummut atatillugu aningaasaliissutit sanaartornerup sukkassusissaanut piviusorsior tumut

naleqqussarneqarsimassasut soorunami naatsorsuutigineqarpoq, tak. sanaartugassanut aningaasaliissutit piviusorsiortumik ingerlanneqartarnissaat pillugu ataatsimiititaliap kaammattuutaa.

Suliassamut missingersuut B novemberip aallartinnerani/qiteqqunnerani naammassineqartussatut naatsorsuutigineqartoq qinnuteqaammi allassimasoq ataatsimiititaliamit maluginiarneqarpoq. Piffissaq qinnuteqaatip Aningaasaqarnermut Ataatsimiititaliamut nassiunneqarfia eqqarsaatigalugu Naalakkersuisut missingersuut B utaqeqqaarnagu missingersuut C tunngavigalugu atugassanngortitsinissaq qinnutigisimammassuk ataatsimiititaliamit tupigineqarmat oqaatigineqassaaq. Tamanna Aningaasaqarnermut Ataatsimiititaliap naatsorsuutigisaanut ersarissunut siuliani issuarneqartunut naapertuutinnilaq.

Tamanna tunngavigalugu Naalakkersuisut inassuteqaataat maanna ilusimittut iluseqartillugit Aningaasaqarnermut Ataatsimiititaliamit akuerineqarsinnaanngillat. Taamaalillunilu isummernissamut tunngavissiaq suliarilluagaq maannali suli pigineqanngitsoq aammalu missingiut B inaarlugu suliarisaq tunngavigalugit allilerinissap isummerfigineqarnissaa ataatsimiititaliamit kissaatigineqarpoq.

Taamaalillunilu missingiummik B-mik pilersaarusernerup naammassineqarnissaa siunertaralugu aningaasat ilaannaasa atugassanngortinneqarnissaat ataatsimiititaliamit taamaallaat akuerineqarsinnaavoq. Sanaartornermut atugassanit agguanneqanngitsunit pilersaarummut atugassanngortitassat sinneruttut tunniunneqarnissaat pillugu qinnuteqaammik nutaamik tamakkiinerusumillu ataatsimiititaliap 2009-mi kingullermik ulloq 16. december ataatsimiinnissaa sioqqullugu ataatsimiititaliap tigusaqarsinnaaqqullugu suliap tamatuma ingerlanneqarnissaanik Naalakkersuisut qulakkeerinnissasut ataatsimiititaliap naatsorsuutigaa. Tamanna aaqqiinerunngimmat pitsaanerpaaq ataatsimiititaliap eqqornerassavaa, taamaaliornikkummi ukiuni ataasiakkaani sanaartornermut aningaasaliissutinik tamakkiisumik piviusorsiortumik atuinissaq qulakkeerneqanngimmat, tamatumani akisussaatinneqarsinnaasutuaq tassaavoq Naalakkersuisut allaffeqarfianni suliassamik pilersaaruserortut kinguaattooruteqarnerat. Aningaasaqarnermulli Ataatsimiititaliap aalajangiineratigut qulakkeerneqassaaq tamakkiisumik tunngavissaqarluni suliassamut isummertoqarnissaa. Taamaaliornikkut Aningaasaqarnermut Ataatsimiititaliap (Nunattalu Karsiata) kingusinnerusukkut suliassamut ilassutitut aningaasaliissuteqaqqittariaqalersinnaanerat killilersimaarneqassaaq.

Suliassap kinguaattooruteqarneranut pissutaasutut Naalakkersuisunit oqaatigineqartut annertunerusumik attuumassuteqanngitsutut isigineqarnermata ataatsimiititaliap naggasiullugu oqaatigissavaa.

Aningaasaqarnermut Ataatsimiititaliap aalajangiinera

Aningaasaqarnermut Ataatsimiititaliamit **akuerineqarpoq,**

- kontomi pingaarnemi 80.00.00-imi, Sanaartornermut atugassanut agguanneqanngitsunut tunngasumi, aningaasaliissutit **1.000.000** kr.-inik ikilineqassasut
- kontomi pingaarnemi 84.40.12-imi, Ilinniartitaanermit sanaartukkanut tunngasumi, suliassamut nr. 060.52.043-mut, Nuummi GU-p allilerneqarnerata imm. 2-anut tunngasumut, aningaasaliissutit **1.000.000** kr.-inik amerlineqassasut.

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliap siulittaasua